

Postaviti na web stranicu
Anel Džarić

UNIVERZITET U BIHAĆU

telefon/faks: 387 (0) 37 222-022
adresa: Pape Ivana Pavla II 2/II
77000 Bihać
email: kabinetrektora@unbi.ba



UNIVERSITY OF BIHAĆ

phone/fax: 387 (0) 37 222-022
address: Pape Ivana Pavla II 2/II
77000 Bihać
email: kabinetrektora@unbi.ba

SENAT

Na osnovu člana 63., a u vezi sa članovima 128. - 133., te članovima 135. i 140. Statuta Univerziteta u Bihaću, broj: 06-1781/2025 od 26. 03. 2025. godine, Senat Univerziteta u Bihaću je na CVII (stosedmoj) redovnoj sjednici održanoj dana 26. 06. 2025. godine, donio

PRAVILA O NAČINU POLAGANJA ISPITA I OCJENJIVANJU STUDENATA NA UNIVERZITETU U BIHAĆU

Član 1.

Ovim Pravilima bliže se uređuje postupak ispitivanja i ocjenjivanja, rokovi i termini polaganja ispita za prvi ciklus studija koji vodi do zvanja završenog dodiplomskog studija (the degree of Bachelor) ili ekvivalenta (u daljem tekstu: dodiplomski studij) na Univerzitetu u Bihaću (u daljem tekstu: Univerzitet). Dodiplomski studij za sticanje diplome traje četiri godine, a vrednuje se sa 240 ECTS studijskih bodova (ECTS studijski bodovi odgovaraju kriterijima Evropskog sistema prijenosa kredita – European Credit Transfer System - ECTS).

Član 2.

Konačan uspjeh studenta nakon svih predviđenih oblika provjere znanja, vrednuje se i ocjenjuje sistemom ocjenjivanja kako slijedi:

- a) 10 (A) - (izuzetan uspjeh u postizanju ishoda učenja bez grešaka ili sa neznatnim greškama), nosi 95-100 osvojenih poena,
- b) 9 (B) - (iznad prosjeka u postizanju ishoda učenja, sa ponekom greškom), nosi 85-94 osvojenih poena,
- c) 8 (C) - (prosječan u postizanju ishoda učenja, sa primjetnim greškama), nosi 75-84 osvojenih poena,
- d) 7 (D) - (općenito dobar u postizanju ishoda učenja, ali sa značajnim nedostacima), nosi 65-74 osvojenih poena.
- e) 6 (E) - (zadovoljava minimalne uslove u postizanju ishoda učenja), nosi 55-64 osvojenih poena.
- f) 5 (F, FX) - (ne zadovoljava minimalne uslove), ispod 55 osvojenih poena.

Član 3.

Ispit se polaže u sjedištu visokoškolske ustanove, a može biti organizovan i van sjedišta samo ako se radi o ispitu iz nastavnog predmeta čiji karakter to zahtjeva. Student sa invaliditetom ima pravo polagati ispit na način prilagođen njegovim mogućnostima. Svi oblici provjere znanja su javni.

Član 4.

Rad studenta se prati i kontinuirano ocjenjuje u toku jednog semestra, a ocjenjivanje se vrši dodjeljivanjem poena za svaki oblik aktivnosti i provjere znanja u toku semestra i na završnom ispitu, na kojem se utvrđuje konačna ocjena.

Predmetni nastavnik je obavezan da na prvom času nastave upozna studente sa oblicima praćenja rada, terminima provjere znanja, karakterom sadržinom i načinom polaganja završnog ispita, strukturom ukupnog broja bodova i načinom formiranja ocjene.

Član 5.

Provjera znanja studenata u toku trajanja semestra vrši se testiranjem, seminarskim i grafičkim radovima, kolokviranjem, zadaćama i drugim oblicima provjere znanja, a može se realizirati u pismenoj, usmenoj ili praktičnoj formi.

Pismena ili praktična provjera znanja iz jednog nastavnog predmeta ne može trajati kraće od jednog, niti duže od dva nastavna sata.

Rezultati ispita se čuvaju do 1. novembra slijedeće akademske godine.

Član 6.

Nastavnik je dužan da javno objavi studentima rezultate o broju osvojenih poena nakon svake provjere i ocjene znanja, u roku od tri (3) do najviše sedam (7) dana od dana održane provjere znanja, kao i ukupan broj poena koje je student osvojio.

Nastavnik je dužan omogućiti studentu uvid u svaki pismeni rad i upoznati ga sa uočenim nedostacima rada, bez obzira na ostvarenu ocjenu.

Na osnovu poena skupljenih u toku semestra i poena završnog ispita, student za određeni predmet može ostvariti najviše 100 ukupnih poena.

U strukturi ukupnog broja poena, koja mora biti opisana u planu rada odnosno silabusu za dati predmet, najmanje 50% poena predmetni nastavnik mora predvidjeti za obaveze u toku semestra.

Član 7.

Predmetni nastavnik, odnosno saradnik, dužan je omogućiti studentu da predispitne obaveze može izvršiti do kraja semestra, odnosno prije početka ispitnih termina na kojima student prijavljuje polaganje ispita.

Predmetni nastavnik/saradnik dužan je ocijeniti, odnosno dodijeliti poene za aktivnosti studenta tokom semestra u terminima utvrđenim silabusom predmeta.

Studentima koji nisu izvršili predispitne obaveze u semestru u kojem su slušali određeni predmet (prvi put slušaju predmet ili studenti koji su prenijeli pomenuti ispit u narednu godinu) dozvoljava se izvršavanje predispitnih obaveza u svim semestrima u kojima studenti imaju pravo polaganje ispita, osim obaveza slušanja nastave (predavanja i vježbe).

Član 8.

Po završetku nastave, organizuje se završni ispit, na način koji će omogućiti studentu da u jednom danu polaže završni ispit iz samo jednog predmeta.

U strukturi ukupnog broja poena, koja mora biti opisana u planu rada za dati predmet, završni ispit se u strukturi ocjenjivanja može vrednovati sa najviše 50% poena.

Član 9.

Uslov za izlazak na završni ispit je ostvaren minimalno potreban broj bodova za prolaznu ocjenu u skladu sa silabusom studijskog programa.

Ukoliko se ispit organizira usmeno predmetni nastavnik je dužan omogućiti studentima i drugim licima (nastavnici ili saradnici) da prisustvuju ispitivanju. Nastavnik je dužan studentima saopćiti rezultat usmenog ispita odmah po održanom ispitu.

Rezultati pismenog završnog ispita i konačne ocjene objavljuju se u roku od tri do najviše pet dana od dana održanog ispita. Nastavnik je dužan omogućiti studentu uvid u pismeni rad i upoznati ga sa nedostacima rada, bez obzira na ostvarenu ocjenu.

Član 10.

Vanredni studenti obavezni su prisustvovati oblicima provjere znanja kako je predviđeno silabusima predmeta na svakom fakultetu, koje se, po pravilu obavljaju u toku onih radnih sedmica u kojima se organizira nastava za sve studente, a što se detaljnije regulira pravilima studiranja.

Član 11.

Univerzitet u Bihaću kada je to utvrđeno studijskim programom ili kada to posebne prilike iziskuju (proglašenje stanja nesreće, vanrednih okolnosti, više sile i sl.) može online organizirati i izvoditi ispite u skladu sa odredbama Zakona o visokom obrazovanju na području Unsko-sanskog kantona (Službeni glasnik USK-a br: 26/2024).

Član 12.

Studij I ciklusa (dodiplomski studij) se završava polaganjem svih ispita i /ili izradom i odbranom završnog rada u skladu sa studijskim programom.

Član 13.

Završni ispit u I ispitnom terminu se obavlja u drugoj sedmici nakon završene nastave (januar, juni). Studenti koji ne polože završni ispit u I ispitnom terminu mogu polagati ispit iz predmeta koji nisu položili na kraju semestra u II ispitnom terminu. Između I i II ispitnog termina ostavlja se vremenski period od 2 (dvije) do 3 (tri) sedmice u kojem će nastavnici i saradnici konsultacijama, a po potrebi i dopunskom nastavom pomoći studentima da se pripreme za ispit.

Januarsko-februarski, junsko-julski i septembarski ispitni rok sadrže po dva ispitna termina, a aprilski i oktobarski ispitni rok se održavaju u po jednom ispitnom terminu.

Student koji ne pristupi završnom ispitu iz nekog predmeta ili ne ostvari ukupan broj poena dovoljan za pozitivnu/prolaznu ocjenu za neki predmet, može pristupiti ponovnom polaganju ispita iz datog predmeta u svakom ispitnom roku i terminu.

Član 14.

Student koji obnavlja studijsku godinu, može prisustvovati realizaciji nastave iz predmeta koje nije položio i zadržava pravo korištenja skupljenih poena iz predmeta koji nije položio tokom još jedne akademske godine.

Ako se radi o predmetu iz grupe izbornih predmeta datog studija, student, u narednoj akademskoj godini, može ponovo upisati isti ili birati drugi izborni predmet koji nosi potreban broj ECTS bodova.

Student ima pravo prenijeti u narednu godinu studija do 12 ECTS studijskih bodova ili dva nepoložena predmeta bez obzira na vrednovanje. ECTS bodovi za svaki pojedinačni predmet studentu se priznaju nakon uspješno položenog predmeta.

Student koji ne ispuni uslove za upis u narednu godinu studija obnavlja istu godinu studija i obavezan je platiti naknadu za obavljanje ispita tokom svakog ponovnog polaganja završnog ispita iz predmeta u godini koju ponavlja u visini koju utvrdi Upravni odbor na prijedlog Senata.

Član 15.

Student koji nije zadovoljan završnom ocjenom, ili koji u tri pokušaja ne uspije položiti ispit, može podnijeti prigovor i zahtjev za polaganje ispita pred komisijom u roku od dva dana od saznanja konačne ocjene, o čemu odluku donosi dekan fakulteta. Zahtjev studenta mora biti argumentovano obrazložen.

Dekan imenuje predsjednika i dva člana komisije u roku od tri dana od prijema zahtjeva, ako ocijeni da je prigovor studenta opravdan. U komisiju mogu biti imenovani nastavnici koji imaju izbor iz odgovarajuće uže naučne/umjetničke oblasti, ili alternativno u slučaju nedostatka nastavnici sa izborom iz odgovarajućeg naučnog polja. Predmetni nastavnik ne može biti član ove Komisije.

Dekan studentu određuje termin polaganja ispita pred komisijom u roku od sedam dana računajući od dana donošenja rješenja pozitivne odluke po prigovoru studenta.

Pismeni dio ispita neće se ponoviti pred komisijom, već će ga komisija ponovo ocijeniti, kao i sve radove koje je student radio u toku nastave i vježbi.

Komisija može donijeti ocjenu na bazi samo pismenog ispita i rada u toku nastave i vježbi (kada usmeni dio ispita nije predviđen silabusom predmeta), ili obaviti i usmeni dio ispita, a odluku donosi većinom glasova. Odluka komisije je konačna za taj ispitni rok. Student može tražiti komisijski ispit iz jednog predmeta u toku jednog semestra.

Član 16.

Ukoliko je predmetni nastavnik, po ocjeni dekana fakulteta, objektivno spriječen obaviti ispit, dekan fakulteta može odrediti drugog nastavnika iz uže naučne, odnosno umjetničke oblasti, odnosno, ako nema nastavnika u radnom odnosu iz uže oblasti, imenovati tročlanu komisiju od članova iz srodnih oblasti, da obavi završni ispit.

Član 17.

Rokovi i termini polaganja ispita za dodiplomski studij (I ciklus) na Univerzitetu u Bihaću, u toku akademske godine, su: januarsko-februarski, aprilski, junsko-julski, septembarski i oktobarski.

Zimski semestar

Ispitivanje i ocjenjivanje studenta se vrši dodjeljivanjem poena za svaki oblik aktivnosti i provjere znanja u toku trajanja čitavog zimskog semestra.	od 1. do 15. sedmice u zimskom semestru
Završni ispit (I termin – januarsko/februarski ispitni rok) za predmete zimskog semestra.	17. sedmica u zimskom semestru (januarski termin)
Dopunska nastava i završni ispit (II termin- januarsko/februarski ispitni rok) za predmete zimskog semestra.	od 18. do 20. sedmice u zimskom semestru (februarski termin)

Ljetni semestar

Završni ispit (aprilski ispitni rok) za predmete zimskog semestra.	tokom aprila mjeseca u ljetnom semestru prema rasporedu ispita
Ispitivanje i ocjenjivanje studenta se vrši dodjeljivanjem poena za svaki oblik aktivnosti i provjere znanja u toku trajanja čitavog ljetnog semestra.	od 1. do 15. sedmice u ljetnom semestru
Završni ispit (I termin – junsko/julski ispitni rok) za predmete zimskog i ljetnog semestra.	17. sedmica u ljetnom semestru (junski termin)
Dopunska nastava i završni ispit (II termin – junsko/julski ispitni rok) za predmete zimskog i ljetnog semestra.	od 18. do 20. sedmice u ljetnom semestru (julski termin)
Završni ispit (I i II termin – septembarski ispitni rok) za predmete zimskog i ljetnog semestra.	Prva i druga polovina septembra tekuće akademske godine (dva septembarska termina)
Završni ispit (oktobarski ispitni rok) za predmete ljetnog i zimskog semestra.	Prva polovina oktobra mjeseca tekuće godine

Studenti koji ne polože i prenesu neki predmet u narednu godinu (koji uslovno upišu višu godinu studija) imaju pravo polaganja tog predmeta u svakom terminu (januar, februar, april, juni, juli, septembar, oktobar), osim u slučaju vezanih predmeta koji su definisani silabusom, koje moraju prethodno položiti.

Član 18.

Student koji je u posljednjoj studijskoj godini odslušao sve predmete, ovjerio posljednji semestar i položio sve predmete iz prethodnih studijskih godina stiče status studenta apsoluta.

Student apsolutent ima pravo polagati nepoložene ispite svakog mjeseca. Apsolutentski staž traje 24 mjeseca od isteka posljednje godine studija.

Po isteku apsolutentskog staža, student upisuje obnovu završne godine u statusu vanrednog studenta i završava svoje obaveze po studijskom programu koji je bio na snazi prilikom upisa u prvu godinu studija.

Član 19.

Ova Pravila se primjenjuju za studente koji studiraju na članicama Univerziteta u Bihaću, i koji su upisani na svim studijskim godinama Univerziteta u Bihaću, od akademske 2025/2026. godine.

Tumačenje odredaba ovih Pravila daje Senat Univerziteta.

Član 20.

Stupanjem na snagu ovih Pravila prestaje da važi Pravilnik o polaganju ispita na Univerzitetu u Bihaću br: 06-4344/10 od 30.12.2010. godine, Odluka o izmjenama i dopunama Pravilnika o polaganju ispita br: 06-1538/2011 od 28.04.2011. godine, Odluka o dopuni člana 9. stav (1) Pravilnika o polaganju ispita od 01.10.2015. godine, kao i sve ranije pojedinačne odluke Senata Univerziteta u Bihaću vezane za polaganje ispita.

Član 21.

Pravila stupaju na snagu narednog dana od dana objavljivanja na oglasnoj ploči Univerziteta.

Broj: 06- 3484/2025

Bihać, 26. 06. 2025.



Predsjednik Senata


Prof. dr. Atif Hodžić